

梁

園

風

雅

明雍丘趙彥復微生氏選李空同何大復王浚川  
孟有涯薛西原高蘇門劉嵩陽張周田謝四溟九  
先生詩并附已詩一卷於其末名之曰梁園風雅  
夫風雅以梁園爲稱首尚矣自漢梁孝王延致齊  
人鄒陽淮陰枚乘吳莊忌夫子之徒司馬相如亦  
自蜀往焉一時文學之士曳長裾飛廣袖相與遊  
曜華之宮集忘憂之館酒酣樂作授簡抽豪若今  
所傳柳賦月賦諸篇率多彬彬可觀而相如子虛  
鏗訇震發極風雅之能事何其盛歟後世騷人才  
子若子美太白客遊於梁往往登臺懷古慷慨歌

呼以發其輪囷磊落之氣蓋兔園之流風餘韻藹然被於梁宋間者至於久而不衰趙氏取以名是選也固宜雖然梁園當日鄒枚莊馬之才固極天下之選而其人則皆不產於梁今九先生惟謝徵君本臨清人流寓鄴下其餘皆豫產也夫明詩至弘治之世李何崛起一變宣正以來流易之習號爲極盛嗣是王孟諸公後先代興追古作者雖止中州一方之學而累朝之菁英若總萃於斯焉則昔人所歎豫州人士常半天下殆非虛語而亦庸非生斯土者之厚幸歟余不才生長中州性好風

雅自少與侯朝宗賈靜子輩爲雪園六子社今老  
矣思從曩人邈不可得不禁山陽聞笛之愴而獨  
喜是編爲吾鄉先正之遺芬每愛翫流連弗忍置  
會嘉定陸生廷燦請重付剞劂以永其傳遂欣然  
序之以行後之覽者其以是追平臺之逸響可也  
康熙甲申中秋西陂宋犖序

原序

往閱屠緯真云河嶽英靈之集在衡社於西北蓋以空同大復諸君子皆北產言若憤而非誣則竊詫之以爲是諸君子者半出吾嵩河間攜鉛提槧鼓吹休明不失爲千秋大業足矣何至謂天從有獨私以誨妒也已取諸君子詩讀之低徊二百餘年遽然心開緯真豈欺我哉尋欲併梓之成一國風而虞不給輒復輟耳會承乏清庾牘殊簡避影息交旣多餘暇乃揖友人汪君明生相與揚扆累數月擬授殺青而無何抱弟女感悲涼愴結卒卒

忘所記又明年余將解庾節以歸明生亟趣之謂於諸君子不可有諾責余率爾以應乃不能有當也余以質明生往者爲表章先達旣詘於力而有去取顧取者不必賢於去而去者不必不賢於取將謂我何明生曰王長公有言余嘗試諸生藝矣始而得其文以爲鮮不可取者則多取之旣而厭其同虞其溢額以爲鮮可取者則少取之旣又畢而衡其所棄者未必遠所取者也則始不勝愛而後不勝厭也天下事大都爾爾雖然刪煩芟複法亦如是足矣抑卽得是刻而廣布之豈獨子之鄉

人藉以不朽毋寧使緯真而在且謂西北之氣又  
獨私於豫也不大有氣色也哉因相視而笑萬曆  
丙辰秋日百門漁父雍丘趙彥復微生序

凡例

一河嵩靈秀代毓聞人功德尚矣其次立言夫言非文不傳文非人不重是編入選止爲河嵩紀勝非中州之人不錄也

一按李獻吉族譜稱先世自扶溝再歷慶陽猶有留扶溝之大岡者其考爲封丘王授隨居大梁遊郡庠而弘治癸丑登科錄亦著扶溝人然則五十八年之中其西還蓋無幾矣若夫聚族於斯婚嫁於斯長子孫於斯營丘墓於斯非梁人而何遂定爲扶溝人



一按薛君采狀志其先出自偃師而隸武平赤籍蓋亦河嵩人也遂仍獻吉例錄之

一謝茂秦世居臨清以詩聞鄴下趙康王徵爲上客因卜居焉子孫遂留不歸鄴志載在流寓傳中故稱鄴中流寓

一諸家詩俱以全集入選其他選所載及附見他集者不必盡錄

一是編李何高薛諸公入楊用修皇明詩抄李于鱗詩刪黃清父國華集中者咸錄不遺若皇明風雅明詩七言律則猶有去取

一河嵩之間名著藝林者豈止數公是編第以篋中所有入選諸名家文集未能周見者尚多同志君子能爲求致隨當續入樂成中州盛事不能無望於來哲云

諸公爵里

李空同先生名夢陽字獻吉扶溝人登弘治癸丑進士仕至江西提學副使公雅尚氣節爲司徒郎上孝宗封事人擬之漢賈生云論壽亭侯事下獄隨貸之武宗踐阼閻瑾等恃舊恩時時亂政九卿合疏論劾不報瑾知疏草出公筆深憾之欲置之死誣罪下獄非何仲默康德涵幾不免矣瑾敗起督江西學政與江御史構陷以寧藩之獄林司寇待用力救得免晚居大梁文名益重公爲詩追還風雅馳驟騷選遊神玄眇之

域範物造化之表龍翔虎變出入窈冥復古之  
功於斯爲盛誠一代之宗工也有集六十五卷  
今選諸體詩如干首爲五卷

何大復先生名景明字仲默信陽人登弘治壬戌  
進士仕至陝西提學副使公姿蘊幼清才標蚤  
貴爲中書舍人謝病里居闔瑾矯詔免其官瑾  
敗用薦起銜雖列夫持衡身未離乎簪筆蓋亦  
工於摘藻而恬於謙退者也及其校士秦關心  
勞神瘁蘭摧玉折藝林共悼悲夫其詩以清遠  
爲趣俊逸爲宗務在舍筏而自見神情與獻吉

分鑣異軫各臻其極一以爲霆驚電煜駭目振  
心一以爲落日明霞餘暉映遠海內並稱李何  
如蘇李李杜云爾有集四十卷今選諸體詩如  
千首爲五卷

王浚川先生名廷相字子衡儀封人登弘治壬戌  
進士仕至太子太保兵部尚書左都御史謚肅  
敏公亮節天植文學性成選庶吉士授給事中  
以數直諫左遷判亳州識薛君采於諸生中量  
移縣令拜御史按秦視畿輔學政言事不避權  
貴謫丞贛榆再歷郡邑擢四川提學僉事公兩

衡文柄造士有方會何仲默亦在關中欲與約  
境上共修章程三歷官持中丞節撫巴蜀南蠻  
吐蕃咸知嚮德累官本兵總憲內臺風紀爲之  
一振公詩意率詞直達事而止雖復潸沆無涖  
然亦無別涇渭與李何並驅中原同倡異調各  
鳴其所當鳴獨鄭善夫稱之蓋以臭味之相近  
也有家藏集幾十卷今選諸體詩若干首爲一  
卷

孟有涯先生名洋字望之信陽人登弘治乙丑進  
士仕至南京大理卿公高朗峻邁雄視梁楚梁

楚中擅名詞苑則推仲默公與樊少南戴仲鶚  
諸子講業其間接跡而起稱一時之盛初爲行  
人拜侍御史侃侃敢言以論權貴下禁獄尋釋  
之謫授桂林間關蠻煙瘴雨殊無憔悴牢騷之  
狀移汶上則以休養罷民而加惠焉累遷湖廣  
僉事廢而復起由藩臬歷中丞總督南京糧儲  
尋贊寧夏軍務內安外攘功宣塞垣尋轉廷尉  
公才華璀璨氣度不羣詩長於敘事情多委婉  
第乏道上之致所與倡詠者若北地浚儀江左  
歷下皆一時之雋羽翼頡頏策名文囿有自來

矣王子衡收緝其文釐定十七卷今選諸體詩若干首爲一卷

薛西原先生名蕙字君采偃師人隸武平衛籍登正德甲戌進士仕至考功郎中公始生三月偶見芒神呼曰芒兒家人驚怪亟沃以水乃止長益穎悟王子衡賞其文以爲李何之流初授刑部主事屬武宗南幸抗疏力諫頃之調吏部值世宗入繼大統會議大禮朝堂紛如公撰爲人後解爲人後辯以奏下詔獄繼而羣臣伏闕大哭上章上震怒杖譴公以先繫獄獲免亡何議



禮者新貴欲甘心於公遂放歸公含章在野譽  
望日隆而竟未究厥施其詩咀英魏晉振秀齊  
梁意繇密而辭新格醇雅而調逸古昔名流作  
咸合轍復偃息丘園心耽味道以右丞蘇州擬  
之風斯下矣集十卷今選諸體詩若干首爲二

卷

高蘇門先生名叔嗣字子業祥符人登嘉靖癸未  
進士仕至湖廣按察使陳約之謂公夙稟降崧  
之精早契藏山之旨獻吉君采見結忘形曾無  
先覺由營繕尋調吏部有考功稿謝病居里有

讀書園稿出叅大藩有晉陽稿遷楚臬有入楚  
稿在晉闡首拔亢太史世稱知人居荆南恒邑  
邑不自得亡何發病卒公負淵敏之才有亢潔  
之性爲詩多胃臆語吐言成章不假緣飾誦之  
若落落直致而中自豐腴雖跡在周行乃情懽  
在野王元美摘其佳句稱清婉深至爲五言上  
乘知言哉集八卷今選諸體詩若干首爲二卷  
劉嵩陽先生名繪字子素光州人登嘉靖乙未進  
士仕至重慶知府公性簡亢而富有其業家擅  
園林之勝門繁賓客之履初歷事司徒署數日

不至大農梁公詰之公作書深詆梁公梁公殊  
不介意授大行拜給舍論事骯髒不平所謂意  
廣才疎於公有焉一麾出守識張肖甫於弱冠  
之年期爲重器延與子黃裳同研席後致通顯  
人服公之藻鑑久之放歸益治玄湖別墅移石  
成奇峰匯水爲巨浸花林竹嶼壯麗甲於汝南  
公與賓客放浪賦詩以此自娛其詩宏博整瞻  
浩渺渾深披潘陸之宸葩摘顏謝之春藻蓋光  
黃之奇偉人也集若干卷今選諸體詩若干首  
爲一卷

張周田先生名九一字助甫新蔡人登嘉靖癸丑  
進士仕至僉都御史公少以瓌瑋之才繼起李  
何之後簡雲散玉馳驟中原弱冠秉銓冠冕人  
倫中朝流品倚之爲重時李王宗徐諸子講藝  
長安龍門高峻得公及張余二子稱三甫云屬  
王元美以家難棄青節來京間微服入都官獄  
省侍公頻過野寺相勞苦相對輒慷慨悲憤元  
美謂偵者眈眈而視寧不畏乎公曰不過攫我  
頭上進賢冠耳亡何左遷廣平丞擢荆南僉憲  
以勘事數往來巴夔間尋觀甘涼兵最有聲西

微累官中丞持節撫夏州選將訓兵嚴飭障堠  
隱然爲朔方長城孰謂文人不必工吏事哉公  
詩體大思精華整簡勁兄李王而肩隨諸子藝  
苑避之元美謂其奇秀超詣海內信以爲然集  
十卷今選諸體詩若干首爲三卷

謝四溟徵君名榛字茂秦臨清人早歲以聲詩鳴  
河朔間趙康王修梁王故事延爲上客當筵授  
簡人擬漢之鄒枚云公才負不羈性耽遊覽雖  
卜居於鄴中乎時遊大人成名雅重節俠海內  
人士一與定交輒以肝膽相向周人之急即傾

囊倒篋無所惜濬人盧枏以簡傲忤悍令陷之  
大辟繫獄十年餘公所至輒爲涕泣白寃後得  
釋公無纖毫德色人亦以此多公入都與歷下  
東吳諸子揚榷風雅于鱗嘗賦二子詩有遂令  
清廟音乃在褐衣客之句元美贈詩有蕭索一  
韋布傲睨千古才隱士代失職達者慚其故其  
爲名流所重如此公詩鏤心雕腎力追古昔律  
則比蹤工部絕則競爽龍標餘亦在開元天寶  
之間若其攬景摹事絕去凡近一步一趨深合  
軌度非老於斲輪者不能詩二十卷今選諸體

詩若干首爲五卷

東郡後學汪元范述

梁園風雅目錄

李空同

樂府

七首

五言古詩

一百首

七言古詩

五十三首

散篇

十九首

五言律詩

八十九首

五言排律

八首

七言律詩

六十二首

五言絕句

十二首



六言律詩

一首

七言絕句

二十五首

梁園風雅卷一

雍丘趙國鑒生選

東郡汪元范明生校

李空同

樂府

榆臺行

榆臺高高風吹樹梢都搖搖臺下黃羊走黃蒿山  
頭看看日落感築四面吹軍中白旗身姓誰向前  
看有河河水深彼不怕死我亦人力能拔虎尾人  
虎或兩存歸爲鬼雄榮爾魂

白毛行

元日地動生白毛發春當暖風蕭騷天時尚然有  
錯迕老夫何怪兒童曹君不見猛虎失勢人寢其  
皮惜也豈復能咆哮我歌白毛比之董逃

猛虎行

猛虎本居深山我可不入彼來亦難誰令爾今來  
市中遊盡日攫人食撐腸拄腹無歇休我欲擊之  
刃不在手欲往告泰山之君陸無車水無舟猛虎  
聞言向我怒我命在天匪虎懼嗟嗟虎尚有時鴟  
鴞遺音寧爾知

大堤曲

漢水白離離月落山黑時  
堤頭石不平走馬誰家  
兒儂住襄門西而在漢水北  
浮橋不著纜郎詎得  
儂識大船何處來落帆向儂  
許高鞞白恰子識是  
真州估

擬燕歌行

銀河耿耿秋夜長牽牛織女限河梁  
終日弄杆不成章  
延頸北望涕沾裳自君別我之他方  
錦衾燦兮獨空牀  
北風發發天雨霜鴻鵠垂翅不能翔  
谿谷天寒林樹蒼道路欲歸多虎狼  
人煙斷絕乏資

糧爲君憂愁斷肝腸思策良馬逝君旁中道失路  
河無杭攬衣踟躕夜未央願爲浮雲歸故鄉

子夜春歌

共懽桃下嬉心同性不合懽愛桃花色妾願桃生  
核

柳條宛轉結蕉心日夜卷不是無舒時待郎手自  
展

五言古詩

雜詩

二首

西國有佳人獨立青雲端容豔若桃李左右佩芳

蘭含思理玉琴泠泠一何閒更節有餘悲曲終再  
三歎借問歎者誰中意難自宣沉吟攬衣帶仰視  
鳴鶴翻思阻望不申何況隔丘山

茅以韜爲席柏以勁爲薪君子憂治世愚者幸不  
辰張且以待兔雉也菑其身物理雖云殊懼脫各  
有因浮沙卷奔藿朔吹揚驚塵日暮臨大道悵望  
曷能陳

### 發京師

薦蘿附松柏枝葉固相因行子戀儔匹况遇同鄉  
親北風起河梁日暮多飛塵攜手同車歸駕言西

適秦道遠長渴饑客子懷苦辛仰瞻天漢流夜永  
不得晨駟馬媚其曹鳴鴈各求羣明星出東方照  
見車下人夙興即往道登彼高路津還顧望京邑  
愴焉何所陳

衛上別王子

二首

晨風應候至鷄鳴各嚴車我今游宋中子當旋舊  
閭僕夫理前綏轅馬悲鳴趨一別阻秦周相望萬  
里餘首春霜露重厚汝征衣襦昔爲同袍士今在  
天一隅故者日以遠疇能察區區

稅車朝歌里送子輝水陽羣鴈起高飛凌風各分

翔軟交多故懷况乃憂故鄉征夫愁短日去馬知  
路長童童孤生柏結根南山旁願言采此柏遺我  
心所當良無白鵲翼何以得高鵠

贈徐禎卿

獨處忽不憚攬衣循東廂樹木何修修春風起飄  
揚我友駕在門告言適江湘倉皇挈玉壺追送臨  
河陽顧瞻兩飛鳬並戲水中央翩翩厲羽翮鳴聲  
一何長奈何游客子一別永相望時澤亮有周天  
命固其當薄終義所劣別離庸詎傷懿彼回路贈  
慷慨申此章



贈王舍人昇 二首

迅風激高雲朝日照嘉林良友忽遠適惻愴摧我心  
川原望靡極江路浩且深殊域寡親戚孤子故難任  
荼蓼積愈苦淚下不可禁

攬淚瞻林木韡韡敷華葉層闌帶廣陌車馬暮相  
疾駢裾侈高會誰念獨守妾豈不思芳舟川廣不  
可涉葑菲遺下體舉世重紅頰勸子且寧志爲恩  
孰周浹

又贈王舍人 四首

送美城東陌還車望上陽觀闕百餘尺蓉城鬱相

望同在天一隅子今旋舊疆經子故所居我馬立  
徬徨

徬徨亦何爲悵望遠行客枯桑號天風時節修復  
易簪紱匪我榮棄置安所惜願爲東南風遂附高

翔翔

勁翮無羣棲靈根豈叢蒨人生非苦匏安得常相  
見動息各有因况乃異鄉縣徘徊岐路側仰視雲  
中鴈

鴈征會來歸君行何日返驚風飄馳光歲月忽已  
晚登山采白苓遺我心繾綣上言制頽齡下言助

餐飯

贈劉元瑞 三首

矯矯雲中鵠忽忽晨南翔連翩客游子駕言逝何方  
霜露日夜零東路悠且長意欲從子逝我馬玄  
以黃徒思諒無益欲置難遽忘愛子千金軀雙親  
在高堂

青陽獻嘉歲玄鳥鳴我堂遠子念行役驅車發南  
疆豈不誠辛苦王事切中腸駢駢汭原薄拊劒何  
慨慷羣形冒休澤朽榦揚朱芳君子法天造小人  
曷能臧

回車太行谷結轡登羊腸羊腸何崔嵬俯視見大江  
大江日東注游子悲故鄉故鄉復迢遞欲濟河  
無梁晨起振我纓駕言行朔方丈夫貴榮名臨路  
徒離傷

贈徐陸二子

清晨思行游駕車郭西門凝霜被野陸莽莽多荆  
榛霖雨不歸川四顧無行人何意岐路側悵然獲  
所親晤言不須臾含意俱未申雲間富才傑具區  
產名珍一爲時所知光耀在青雲情交苟不劣窮  
顯非所論感激平生義匪爾誰當陳

申州贈何子

翩翩雙黃鵠凌風各將去哀鳴岐路側一步一回  
顧何異同心子失散在中路別君倏五載我髮忽  
已素今逢不須臾趨駕一何遽臨分但踟躕道語  
不及故山川何悠悠白日奄欲暮努力愛玉體慰  
我長思慕

送姪木北上

羣鴉競時食孤鴻獨高翔丈夫四海心誰能安舊  
疆仗劒辭所親策馬登前岡歲晏霜露繁原野何  
茫茫艸枯禽獸飢潢潦浩以長感吟悲蒹葭試鳴

候朝陽勗哉樹名勲念茲西顧光

送谷氏

零雨晨微微艾葉何旆旆端居輟中憂駕言送征  
邁黃河流湯湯飛雲下燕代臨汀羅觴俎趁景徒  
傾蓋轅馬望路鳴僕夫整衣帶孰非金章客子也  
獨所愛行行樹聲猷及此明良會

贈甯氏

野菽葵平畛寒露一何早凝霜一以零蘭蕙亦衆  
艸美人中夜興憂心怒如擣玉石誠靡別妍華恃  
疇保瑟瑟谷中松見者豈不寶良無匠氏顧歎息

歲將老

送蔡帥備真州

颺舟逾長淮登陴望大江  
氣勢何鬱盤皇矣真我  
邦宮殿髣髴高攄山變青  
蒼橫颺靜霜夕天塹如  
沸湯時平智士拙貨賤  
良賈藏無言邊境勲寧居  
亦慨慷

述憤

五首

帝居杳何許蒼蒼隔九關  
白玉爲阿閣黃金爲重  
門可望不可扣仰見飛雲  
奔何當發炎旭下照孤  
葵根

飄風自南來颭颭入我懷我欲隨之翔北向三重  
階守閤遙望子閭闔何由排戚戚勿重陳危言多  
厲階

小艸生枯桑芊芊競芳辰雖云殊本根寄託各有  
因自我罹幽囚忽焉經浹旬我兄千里餘渺渺長  
河津妻子日望余蒼蒼隔西鄰所幸二三友笑言  
越昏晨宵鐙促燕膝昵語忘苦辛患難苟相得毋  
論骨肉親

檐月何徘徊晨風復依依載言別同居倉皇倒裳  
衣處者各惆悵去者從此辭挽手刺刺語寄言家



中知丁寧故與親願勿長相思明明昊天威我久  
寧在茲

明月出東方徒行反家室室人走相訊問我何由  
出明知非夢寐欲辯仍自失喜極雙涕零轉面各  
銜恤垂鐙照緇卷浮埃滿朱瑟愁言卒未傾忽復  
見晨日

離憤 三首

采采河邊蘭鯉魚何盤盤念我同胞人訣絕摧心  
肝事變在須臾浮雲逝無端臨發路踟躕誰敢前  
爲言原鴿抗高聲我行何時還十步九回頭淚下

如流泉

練練晨明月鬱鬱風中柳蒼茫遮我車識是平生  
友感君故意勤贈我雙瓊玖虎狼夾衡軔狐狸州  
間走東方漸發白聊歸勿爲久天威煽方處君子  
必其口

結髮事君子締結固不解青蠅玷白璧馨香逐時  
改恩阻愛不周棄擲良在此紅塵何冥冥白日淪  
西海對面有訣絕何況萬餘里得寵各自媚誰爲  
展情理訛言方蜩興君子慎其始

雜詩

十一首

英雄樹大業奮志常慨慷捐身赴國仇效命爭戰  
場明甲耀皎日挽弩千石強矢石下如蝟殺聲如  
沸湯被刺目不逃貼危氣益昂雄名輝冊符生死  
固其常

命駕將何之意欲快我心蠻方亂如麻匈奴寇榆  
林揮劒誓俱亡彼軍忽如沉豈爲尺寸勲國仇怒  
至今崑崙貢織皮鴟鴞懷好音功高固不賞讒妬  
來相尋哀哉險側子傾詞誰見欽

有行東園椒結實何累累條遠敷不易斧者見行  
摧燕雀奉小鳥志欲翬天飛哀哉不自諒失路將

安歸

悲風厲歲晏宵旦未云已  
寒冬雨雪至江漢驕南  
紀臨堂翳孤松杳杳歎成理  
涼潦不溢澤時鴈鳴  
高起一飛摩青天倏忽乃  
萬里訊言蓬蒿士杳杳  
竟何以

登山望四海日夕忽至沉  
俯身眺城郭瘴然沾我  
襟交路夾芳蘭逝駟何駸  
駸朱樹藹閒榭奇巧媚  
荒淫北里進異舞高唐呈  
妙音纖羅振芬芳朝雲  
遞嘉吟不見秋至艸零落  
愁春心

倚閭遲佳人日暮期不來  
拂衣舍之去去上延秋

臺旗旌蔽原坂鼓角鳴且哀黃鵠翔不下腐鼠鴟  
見猜壯士憤國難撫劒但徘徊白日倏西顧愴惋  
肝肺摧

灼灼綴枝華榮豔一何好朝陽溢其葩餘光照寒  
槁冠蓋沓衢路致身競先早磬折名譽場銷鑠成  
醜老一夕不復晨隕落隨秋艸逍遙可竟世繁華  
詎足保

昔有玩世士乃處匡山阿其人久已冥春林發煙  
蘿故址栗里旁見者不忍過荷鋤豈不苦刈薪行  
且歌詆毀日來加醉酒良靡他沉冥在一時千載

固難磨小兒爲督郵磬折將如何

昔余遊淦南曾上升天臺茲也誠玄冥萬里悲風  
來松柏摧路旁玉梁安在哉舉手招王喬三洲限  
蓬萊黃鶴舞高岑清雲曳徘徊歎息長久術愴惻  
令人哀

匡山有老人自稱巖下公綠髮渥朱顏皎若雲間  
鴻往來騎白鹿姿美精內充招我將從之心阻難  
遽通流情復高翔翩翩駕天風夙昔思此人寤言  
期與同感此重狂顧德音常在衷

昔余挾詩書京里揚鳴珂敷藻藝林間結交聚邊

何豈云傾人城絕代耀姿華分散條老醜孤遊江  
湘阿出攀芳桂林倚岑揮浩歌荆榛蔽丘原浮雲  
一何多靈劒有合并詠言傷蹉跎

值雪詠懷

索居倦晨暮沓沓傷歲窮玄雲爲誰屯流霏夜常  
風映隙旣窈窕穿窗亦玲瓏凌高似有綴填卑忽  
若崇裒多雖稱物益寡竟誰功匪無盈尊酒斟酌  
解我忡途路悵伊阻佳期杳莫同握瑾惜楚老投  
瑤怨國風人欲天必從精感理能通鍾絃曠易絕  
郢調寡彌工持爲知音說庶以折其衷

襍詩 三首

宛宛春田鳩飛鳴柔且閒一朝化爲鷹肅肅厲羽  
翰衆禽不敢並孤立秋雲端鳥旣不自知人胡究  
其然

繇繇谷中葛引蔓在修楚修楚伐爲薪葛也安所  
附豈無絺與綌可以禦清暑烈烈嚴冬時憂君乏  
纊絮

汎汎河上舟搖搖靡攸止我欲維此舟川廣不可  
洙振振鳧與鴈棲食在波水豈不良幽寞夙心耽  
樂此



春日洪法寺後岡

暄陽入廣墟平阡暖煙蕪稅鞅尋高禪陟丘眺神  
都白日麗中衢青霏藹林岵碧艸一何萋叢葩亦  
已敷累累誰氏墳嶢嶢三浮屠鑿石錮九泉雄構  
耀城隅輿臺盜綺衣苔蘚封丹樞矯首視天宇剡  
剡浮雲徂崇名古所欽多藏祗區區

贈王康邊何四子

綿綿遠道積冉冉歲華晏冰霜夕轉嚴星斗夜仍  
爛蘭缸照寒戶旅士懷鄉縣方幸厠鱗鬣詎謂各  
分散岐路忽在茲山川復悠緬王子萬人特英論

薄煙漢康生千里足邁景速流電瑰璋欽奉常秀  
朗推中翰冲標汎光蕙逸思凌玄鴈所嗟異根株  
逝矣悲霜霰興言念晷晤佳期難懽宴

寄題隴州閻氏林亭

出處信不易卜築豈在遠聞君壯年日頗此遂仰  
偃創基倚北阜開窗面層巘雜樹莽蔚蔚長流激  
清淺跡異願不隔路阻日遂晚愉悅各殊趣幽意  
不逮顯春風翻深谷裊裊葛葉展代耕與灌園垂  
老付所遣

贈李僉事衡

處世寡諧合營道無貞心緬邈伯牙絃歎息誰爲  
音竊祿匪我志隨風豈能任所以棄朱紱窮年臥  
空林君子枉榮顧駟馬一何駸輕蓋蔭白日軒車  
市庭陰宴晤及春期列筵享同襟目快淑氣艸耳  
聆悅時禽肴至弗徒歸觴舉恨不深末路校通塞  
鑒止無飛沉託意誠匪殊在遠固宜欽願言附松  
蘿子其斷堅金

將赴江西寄別殷伊陽明府

引年豈必老求志不在奇曰余逾壯齡遭斥還山  
棲事與北門合跡擬東陵齊滅音謝人徒四暑忽

逮茲向平果遺榮謝安終徇時詎意值嘉運末照  
及葵藜簡書下我廬急遽誰得辭迢迢江西帆別  
當首夏期束裝遂流潮改服團炎颶情鬱爲念故  
寄重慚余卑虞絃改自調孔鐸湮誰持江漢誠暫  
浮匡廬寧久羈返貞意已堅抒懷告心知

鳶山訪汪氏因贈

昨余發弋邑急霰舞鳴湍灘高果莫泝改騎凌層  
山山層水復曲歲晏嵐風寒捫蘿冒嶮艱踏冰涉  
回沿日入達平夷倏覲君子關清溪交遠川高松  
夾路間遺榮靡所希時仕義乃詮未羨焚魚高頗

欽奇字傳矧伊連枝芬慰我同心蘭綢繆促宴年  
曙猿響南巒

內弟左國玉輓歌

滔滔水東逝靡靡日西馳日馳雖更晨水逝無還  
期清醕滿華尊鳴琴在旁茲門堂不改故若人竟  
何之天柱獨兼今凝澄究若斯二紀罔自保千秋  
寧詎知情慟道與結感往志彌悲皇皇徂暑月捐  
我就郊岐故築即新墳廣路席前基狐兔夕向啼  
芳麻延碧滋解缺心已許回轅痛豈欺永測游魂  
理徒此眩盈虧

熊御史卓墓感述

幽幽山下江峩峩山上松  
累累松下墓瑟瑟松上  
風慨昔與君遊並遊京華中  
我冠省臺內鳴鑾趨  
步同中更歎莫偕永逝當何逢  
絕絃已易慘挂劍  
今誰從駕舟亂回陽展墓臨高崇  
浮雲駭南流顧  
望摧我衷德音旣長已情感胡由通  
祇餘泣麟意  
悲歌傷命窮

余懷百門山水尚矣頗有移家之志  
交春氣熙忻焉獨往述情遣抱四詠  
遂成示同好數子

魯連蹈東海介子逃西山方舟信超越巖徑安可  
攀揚烈猶靡懲置金徒嗟歎伊余秉拙訥薄遊及  
茲年急湍有奔桴迫路無停轅慘慘滄流月悽悽  
沙塞煙徒欽靜者意未遂同袍言偶耕慕龐公巖  
棲景焦先捫衷諒有持顧已竟誰諉復來感方寂  
解作憂更牽抑心二十載始別金門還積疴謝人  
徒頗與疎遯便眷茲丘園榮豈羨塲苗篇

浮海傷固窮逾河歎誠邁濯纓萬里流高視九州  
外功成奔運徂氣至流飈代淒淒秋柯零冉冉春  
條嫋周覽倦河壖孤悰冀岩瀨道以沉寂超賞與

崇深會豈惟超遠情亦因謝塵籟聿想山中人風  
吹女蘿帶折麻凌險岼秀采越森蒼眷彌志終申  
獨往竟誰礙崑崙太行峰崑崙百門對抗手別故  
懽垂雲弄煙瀼

閱圖訪名奇久欽蘇門山危峰羅縣牖積石噴鳴  
泉情吟激衛女嘉遯招古賢出遊結夢想神往理  
誰詮連岩旣鬱紆迴渚復綿芊猿吟曙霏豁鴈泊  
暝陰還杖策躡丰茸解裾濯潺湲仰視遊雲翻俯  
察戲藻鮮覽物慨幽存撫化懷冥筌况逢春華交  
更此眺孤煙畢婚非達生一嘯復何言



山客戒明發朋故來攀留岩潭窈叵測險徑增離  
憂曰余負幽僻誦古歌遠遊陟懷康樂屐浮羨鴟  
夷舟探討傾子長浪迹多阮侯若人不可作瑤草  
竟何酬事往悲易深情存道難侔以此激孤詠喟  
然睇滄洲安波有覆臚坦路無全輶危虞豈在嶮  
薄劣終見尤願附綠蘿絲永與棲者儔

自大過渡河趨陂沙岡

凌春遠行邁游目恣沿越漸辨林中曙遽失霞上  
月觸物誰爲情悲歎曷可歇載登隋疆場况眺寒  
城關陽波散初仰陰曲峙寒雪只此判氣候豈必

殊燕粵潛潛濁河駛戛戛晨風發揚帆截驚瀨倚  
棹望窮髮鳬鴈眇難即汀蘭翠堪結美人旣莫期  
天路復幽絕陂岡鬱參錯岸沙皓明滅日暮孤雲  
興何以慰忡悵

陽武詠懷陳平張蒼遂及博浪之事

玉璽戒不力金鏡淪無光大人旣龍興烈夫亦鷹  
揚伊人各乘時矯若孤雲翔韓椎豈在屢秦氣日  
以喪六奇佐揮戈五運開靈昌時來屠沽奮跡往  
英雄傷平生冀風期况乃逾故疆灑淚越修垆含  
凄遡河梁古墳密嶢嶢春沙鬱茫茫徒瞻松柏路

詎申椒蕙芳遺榮竟何尤任智終自戕羨彼赤松  
遊援筆即此章

覽遊百泉乃遂登麓眺望二首

東髮懷幽奇覽籍冀有遇來登百門泉果協佳勝  
趣然然圓波踊藹藹浮陽聚止坎潯泓冽激石迅  
湍注昔聞滄浪濯今解川上喻豈惟傷衛歌兼以  
發蒙慮况值春序中羣物已改故菰蒲冒清深鱗  
介各有慕行羨浴渚鳧靜對栖雲鷺岩霏空潭影  
林藹變朝暮極目北上帆朝宗感游寓

發鞍憩林木杖策陟陁峴巖連嶺叅錯洲曲岸廻

轉白日麗蘭薄原綠靜如洗嘯臺旣清峻行窩更  
幽緬慨念昔時人瞻望淚已泫薜荔夕搖曳蘿徑  
復誰踐碑板半磨滅石門積苔蘚代異道豈隔事  
邁迹空顯獨采石間秀眷此何由展逝鵠無卑音  
潛蚪厭汙淺曠哉古今意難與世人

### 登大梁故城

登高與處卑由來慮多端登高尚寡悰處卑焉能  
懽以茲歷荆榛褰衣躡巘岼土壤帶陰風樓櫓危  
急湍岩岸苦崩奔葭葦何漫漫周望鮮故物俯察  
多憂歎潛魚葺其鱗驚鳥無停翰雲浮誠不任淵

沉諒何難終附巖穴棲斯地非我安

德安趨潯陽

始征晨風息雲流日色展登陸艱且澀厲澗一何  
緬維時仲秋交颼颼林颼卷綠竹垂我車丹花映  
行幘冒巒維有松繡石盡成蘚攀蹇雖多悅亘頓  
乃勞倦日中迫廬岳蹊徑愈回褰雲湧連遙嶢雨  
暗失近巘奔崩萬壑會嶮絕一徑轉遽訝川梁沒  
幸遇石瀨淺道以習坎利用待旣濟顯介石諒益  
固巨川豈遂眩誰哉能豫謀隨寓斯可遣

宿圓通寺

曉發蒲亭邑暮投石耳峰僕夫困霑濡山雨猶響  
松茲壑况窅阻顧望惟溟濛幽巖託層房豁然臨  
候江竹修苞北基巖峭垂南窗俯觀裊戶蘿仰聆  
走簷淙挹此暫足遣逖想情難降陶公有遺墳黃  
子留孤踪通止艮固殊羈縛誰爲悰坐聞吟猿暝  
祇令歸思忡

釣臺亭成

颯颯風礪瀉累累山石峻十構倚岑削簷楹闕奔  
迅俯之纔一壑仰面已千仞歌游竟日夕載色掖  
英俊故杉改新蔭魴鯉况充牣本輕任公釣詎慕

庖丁刃素飈裊延蔓商氣歛芳潤臨深悟邃奧覩  
逝識大順却笑矜名子羨魚一何吝

始至白鹿洞

曠哉超世志緬邈平生思鬱壹眷名跡久注匡山  
陞南涉枉嘉命果諧夙所期仲秋岩壑清宮館復  
在茲白石激寒湍岩蘿裊空基黯傷逝者往密慚  
來者追性同道豈隔途異理空悲興言懷昔賢日  
竟眺前岐榛荒徒鬱紆林菴一何采感情匪哀歎  
聊詠昭言垂

陟嶠

伊昔謝銜歸志頗諧綸釣甘追河上跡切慕蓬池  
嘯孰知紫芝慮竟荷青雲耀值秋歷江郡弭節登  
廬嶠沉深九疊秀峻極千峰峭錦繡亂岑崿晨夕  
改觀眺晶晶游氣歛皜皜寒日曜飛瀑信雷邁奔  
峽還龍躍耽遊遽忘歸久住輕時諠天池絕亦捫  
石鏡坂可照矧茲二三子芬馥含清妙霜嵐澄西  
夕從歌倣希調

廬山秋夕

山壑寒氣早日夕風色繁火流桂將歇霜至蕙艸  
隕蟋蟀集澗館禾黍被疆畛物感憂自攢排遣情



詎忍年徂身與衰時棄世所哂踟躇夜不寐起坐  
萬念軫崖傾月西流嶂曙松猶隱嗷嗷露猿啼行  
行采芳茵

落星石

千江勢欲倒蠡門支孤嶼輝輝雲崖映洶洶湍瀨  
拄霜水落丈餘石角露齟齬探竒犯嶮涉停旄挈  
賢侶褰裳入松寺倚竹望風渚崩奔亂帆下蔽曳  
波鳥舉秋空澹明澄浮山互吞吐靈根合道蘊曠  
蕩豁徧阻貞靡亞砥柱險可並濫湏不聞永嘉勝  
祇因謝公許

泛左蠡

辭山意不悅水泛暫可樂微風逗帆席日竟展光  
耀揚歌蕩溟昧鼓枻極窈窕指顧異晨暮俯仰改  
觀眺出沒湖中山明滅海上嶠素輕左蠡險今覲  
石壁峭謝屐久已蕪陶磯寂誰釣解吟松門詠令  
人發悲嘯

騎登謝址復舟觀於石壁

奮鵠有奇翰古鐸無追響游雲跡易滅鳴世情難  
想昔吟瞻眺詠今覲湖中賞松門旣岑峙川水深  
以廣昏旦候自變伊人竟焉往岩剗徒空嵌堂基

鞠爲莽靡徑不可識悲愉異今曩石壁屹寒岸葛  
崖嘯魍魎攬馭意已極登舟祇彌惘抱茲久延佇  
遵渚路回枉

至懷玉山會起書院

冒險登雲峰雲湧風不卷淒淒松霰響濡濡竹露  
泫沾塗意已困覩構色頗展故堂改頽制新築負  
幽巘伐材但旁谷礮石况非遠清渠激修溜巔畝  
曠以衍偶至若期遇天定固良鮮仰止古有訓靜  
成力可挽祇虞遊業子捷徑爲世筦

曲江亭閣

纜舟金華潭遂陟岡上閣蹊徑阻紆鬱岩水光參  
錯夏林一何清餘雨淅未落高覽景自異况值晚  
霽廊夕日明錦湍歸雲擁華薄近山聿蒼翠遠嶺  
復岑嶸曠蕩感遇寓俛仰歎今昨不見往者悲祇  
覲來者樂顧瞻大江流愈恨代謝速源湧竟誰禦  
謙守諒能曲所貴遺榮名覩義願有勗

自南康往廣信完卷述懷

朝離傍羅浦東至龍潭宿戢柵候明發獨寤守空  
曲宵晝有常理欲往不獲速多慮良攪眠強置復  
攢觸起立萬動寂湍響應鳴谷驚風臨岸激高月

散春木絮雲吐岑岫玉繩低以屬慨哉復奚道徘徊至天旭

廣獄成還南昌

三首

直木防見伐茲言豈我欺若華耀四海孤邈疇見知莊鵬運池溟舉翼九天垂風積苟不厚中路將安期歎息竟何語俛視川波馳溢霖驚洪濤千載固厥時燕石一何珍有驥不自持埜飈激靈襟逝言惋長岐

時至鮮枯林朱蘭被長坂臨嶠覲賢跡停楫暫遊衍靈雨吐葛花相葉已復展佳哉溪上邑流峙亘

而緬岑岑徐巖秀飛泉灑丹巘岩亭交景風裾帶  
時自卷居高乃慮孤涉歷悟攸遣枚枚三陸官千  
秋竟茲顯

夕樓瑞洪渚遙覽渚北山相傳洪崖子乘雲自此  
間履迹今尚存其人邈莫攀粵余登征途頻年涉  
間關毀譽一嬰心寤言多所歎於茲誠跼蹐振衣  
躡前巒淶水莽浩浩驚風蕩回川欲濟惜無梁颺  
輪儻中還

從軍

二首

別家亦云久昨得家中書書中何所云父母與妻

梁園集卷下  
三  
拏昔來柳依依素雪今載塗豈不念還歸天子西  
擊胡登山眺故鄉存沒兩嗚呼丈夫死國讐安能  
戀里閭生當取封侯怨別祇區區

久處行伍間漸知苦樂情能蟠丈八鎗徒御不我  
輕府帖昨夜下燒荒有我名秣馬待天曙肅肅寒  
霜零左韃插雕羽雄劒躍且鳴日高渡黃河東過  
受降城所羨在滅胡富貴何足榮

屯田

日落蒼天昏奔馳吏下屯揚言科打使論丁不論  
門老軍出聽卯老婦吞聲言邊城寡機杼耕種育

兒孫誅求餘粒盡竭力  
秦孤豚昨當總管來宰剝  
充盤餐言旣復長號吏去收他村

塞上雜詩

邊烽日夜至飛符來會兵  
羊牛入高砦鷄犬皆震  
驚壯士按劒起鞍馬若流星  
鎗急萬人靡笑上受  
降城生繫五單于歸來獻天庭

功德寺

宣宗昔行幸遊戲玉泉傍  
立宇表巖嶸開池荷芰  
香波樓遞颺沓風松奏笙簧  
百靈俱來朝落日錦  
帆張萬乘雷霆動千巖滅流光  
綺繡錯展轉翠旗



沓低昂法眷撞鐘鼓宮女拭御床笙鏞沸兩序星  
斗宿巖廊至尊奉太后國事付三楊六軍各宴眠  
百官守舊章巡非瑤水遠跡豈玉臺荒嗚呼百年  
來回首一慨傷鳳騰赤霄暮龍歸竟茫茫山風撼  
網戶紫殿生夜霜退朝值休沐我行暫翱翔娟娟  
登岸林慘慘度石梁廢道哀湍寫松柏間成行啟  
鑰肅覽歷過位增悲涼積久灑掃缺乳鴿鳴膳堂  
舊時琉璃井倒樹如人長神已佐上帝教猶托空  
王鈴磬颯鳴憂晨昏禮相將盤遊非聖理操縱在  
先皇至今朝廷上不改舊紀綱

望湖亭

來登望湖亭始盡覽歷妙布席倚嵒嵌波望領佳  
要山花落天鏡鉤簾巨魚躍巖潭遞隱見圓浪浴  
奔峭屹律百萬閣日落展光耀羈縛阻延放臨淵  
羨孤釣霜寒葭莢白沙晚鵲鷄叫吾非阮生倫於  
此亦長嘯

香山寺

萬山突而止兩崖南北抱鑿翠置殿榭級石上穹  
昊高卑各稱妙曲盡結構巧有泉如線縷盤轉出  
松杪嗜奇忘登頓緣危肆探討險絕逼牛斗蕭颯

梁園風雅卷十七  
若風島夜宿來青軒天色碧可掃湖沙靜莽莽海  
月白皓皓想當邦邑初此地即蒿艸綺麗仡誰鑿  
岩壑爛相裊但看全盛時民力爲茲槁

平坡寺

西山萬佛宇爛若舒錦繡平坡憑風迴突出衆山  
右宮閣因巖坳面勢巧相就百里見琉璃巖嶺戴  
雲構朋遊探絕迹杪秋歷羣岫得此目力展恍疑  
出氛囿仰看北斗逼俯恐東海溜雄壓香山麗闊  
掩望湖秀落木響岩牖寒嵐染衣袖延緬古今并  
佇立悲慨湊盛葉慮反始危基有傾覆千載誰復

臨逆想蓬蒿茂

艮嶽

城北三土丘揭嶰對堤口黃蘆莽瑟瑟疾風鳴衰  
柳云是宋家嶽豪盛今頽朽我聞帝王富東京實  
罕有鑿池通嵌竇移山媚戶牖炭業樓觀全歛吸  
風雷走巖陰翡翠吟海窟蛟鼉吼燕趙矜麗人搜  
剔充妃后君臣互沉湎斯道詎能久嗚呼花石費  
銖鎰盡官取北風卷黃屋此地竟誰守迢迢五國  
城二龍回其首向使任忠良邦國得滅否余來值  
寒暮悲歌坐林藪狐狸竄古壘破瓦沒藜莠孤城

嶠我前蒼蒼日將酉

贈徐子

偃王世蕪沒石麟亦埋翳徐子發東吳英論有餘  
地龍遊滄波阻日出浮雲蔽嗚呼獻玉士竟灑荆  
山涕光掩明珠棄寵奪西施廢古來共如此不獨  
君遭際余本澹蕩人傾蓋託末契酣歌繼旦暮醉  
酒無陰霽各爲征蓬散吾豈匏瓜繫舊時南陽宅  
回首成迢遞蹈海有夙期與子自茲逝

湘妃怨

采蘭湘北沚攀木澧南潯淥水含瑤彩微風託玉

音雲起蒼梧夕日落洞庭陰不知篁竹苦惟見淚  
斑深

出塞曲

單于寇邊城漢將列長營旌旗蔽山谷鉦鼓晝夜  
鳴乘我浮雲騎設我明月弓奇兵左右出長驅向  
雲中彭彭陣結虎颯颯劒浮虹一戰皋蘭滅再戰  
沙漠空歸來獻天子長揖不言功

銅雀伎

帷飄雀臺上絃奏舞衣前羣悲一以望春草爲誰  
妍芳歲銷蘭怨流塵集錦筵爲問西陵道孰與漢

家阡

呂仙洞

孤遊逢呂跡永逝感盧生眷彼炊粱術契我遺世  
情蒼山故國道落日邯鄲城陰陰祠宇夕宛宛曲  
池清不見金芝侶誰聞朱鳳聲田鼉穴桂壁野葛  
蔓松楹寧知往來者不是寐中行

山中

山中雨乍歇一夜瑤草長風吹翠巖竹下應石瀨  
響時來展書坐悠悠絕塵想

登東城樓晚下樓作贈同遊數子

盛陽麗樓臺爛如錦繡錯日入暝煙起俯視但冥  
漠即此悟人理天道固可度動靜啓晦明代謝有  
今昨涼颼逐夕興迴聲滿虛閣四顧水明滅宿鳥  
喧相索啞啞啼城烏噉噉上雲鶴怵怛感晨暮徙  
倚罷觴酌北斗忽復低西月隱長薄閃爍海光動  
翕沓氛霧廓無恃黑頭在早定滄洲約

寄贈端溪子

歎鳳世已遠悲麟竟何爲蘭蕙秘幽巖蕭艾盈路  
岐君子抱明德傷也誰復知隨流非我心特立乃  
見疑亭亭南山松匪無霜霰催寒蕤但不改孤貞



常自持

贈蒼谷子

玄雲翳白日積陰何漫漫風氣日以淒泥雨常不  
乾漂穽委川塗百卉良可歎覽物懷伊人撫時悲  
涼寒憂來如亂絲理之棼無端爲霜念逝鵠多露  
怨芳蘭所嗟聲影隔匪懼馨香殘徒把瑤華音長  
謠望林巒

贈青石子

高鳥有違羣離獸多悲音懿彼婉孌子悵然分此  
襟朝發南河隅夕暮乃北岑玄雲旣無極黃波浩

且深君其四海翔無言還舊林

贈孫生

古人種桃李不爲奪其花君子振英芬豈在文與  
華炎陽赫精彩百卉流丹霞黃彼東園實累累一  
何嘉采者自成蹊舉世徒咨嗟

贈鄭生

伊子解組歸汝也美少年駿馬臂兩弓射獵梁王  
川感子重意氣授之黃金鞭萬里不易致悲鳴爲  
誰前

寄程生

河日淡莽莽飄風但塵沙陰陽爲誰爭時至枯亦  
葩念離傷歲窮懷音怨途賒彼美杳何許孤吟弄  
瑤華夜攬海門月晨吸波上霞苦心誰固知延望  
長自嗟浦鴈回故翼汀蘭茁新芽無負汴上約梁  
園多奇花

田園襍詩

二首

野清雲氣滿塲功亦云畢收穫雖有殊大小各盈  
室感茲狼戾年追念憂苦日紛然噉其饁妻子孰  
遑佚歲工借寒熱人事坐勞逸蕭蕭原野霜何州  
不垂實

壯時掉塵鞅老乃即農務值茲田事終怛然感霜  
露原萋日以歛林華不守故嚴霜淨游氣翔鵲在  
天路鸚雀躍蓬蒿啄食不滿嗟而子竟何言飯牛  
髮今素

梁園風雅卷一